

TRANTER UMENS

da Chatrina Josty

ESTETICA EN IL BOGN

Be gist per dir: Jau na sun betg pingeligga. Insumma betg. Jau na flip sch'igl ha in pau pulvra per terra u sche la vaschella po pusar in pau avant co vegnir lavada giu. Ma jau hai schond pli gugent sch'igl è bel net. Cun net maneg jau simplamain agreabel per star, ins sa sto sentir bain en ina stanza. Quai vala naturalmain era per il boggn. Ma forse è quai precis la differenza ominusa tranter umens e dunnas; umens n'han nagin senn per estetica. Per estetica en il boggn.

En «mes» boggn qua a Friburg, pendea in sigentamauns 3 mais senza ch'el vess vesì ina macchina da lavar, e per terra era in grusig tapet, in savun e blera pulvra. E – il mender, mes «jungs» han druvà il boggn sco magazin per las utensilias da nettegiar. Ina sadella da plastic en in chantun ed il sdratsch be foras en l'auter. Che quel sdratsch era ina giada grischler han ins pudì s'imaginar mo cun blera fantasia. Ma tuttina ha el servì a mes cunabitants era sco tapetin davant la duscha.

Ina chaussa ston'ins però laschar ad els; fantasia hani: las rollas da palperi da tualetta vidas n'hani betg simplamain bittà davent, na, Ralf las ha rimnadas tuttas. Jau na sai betg, sch'el ha vulì zambregiar cun tut, en mintga cas ha la collecziun prendì davent memia bler plaz ed jau hai bittà davent las rollas. Bittà davent ha jau era il tapet dal boggn. Vul dir, jau n'hai betg bittà el en il rument, mo sin stgaffa en suler. (Nua ch'el è dapi lura. Quai èn mo 4 mais). Jau hai imbellì pass per pass il boggn. L'emprim l'avev jau natiralmain decorà el cun mes products da biuti, quai che ha dà gia bler dapli culur a tut. Or da mia collecziun da cartas postalas (il boggn – era in lieu per preschantar las differenzas collecziuns) ha jau zambregià ina tenda per la fnestra. Quella ha crea atmosfera en il boggn ed ha purtà il feeling da vacanzas che na dastga mai mancar. Vinavant ha jau pendì si in pêr bels posters, per exempel in cun si il alfabet russ, gea, quel è didactic e decorativ ! E mintgatant met jau perfin ina bella chandailina en il boggn, ina che fa ina bun'odur. Gea, il boggn è ussa in bel local, in local drizzà en cun senn per estetica. In'estetica che mes cunabitants na stiman betg per forza, ha jau senti. Ralf ha numadamain ditg, che Markus haja ditg, ch'el veglia rimplazzar mia bella tenda or da cartas cun in'otra. Cun ina tenda brina. Oha !

Tranter umens - Chatrina Josty, studenta a Fribourg scriva da sia vita en ina WG cun dus umens